

بلاء العسل و الدم

مسرحية
محمد علي حمّاد



بطاقة الكتاب

بلد العسل و الدم

محمد علي حماد

مسرحية

رقم الإيداع : ٢٠١٩ / ١٦٧٣٨

الطبعة الأولى

عدد الصفحات : ٥٦

تاريخ الإصدار: سبتمبر ٢٠١٩

الإخراج الفني والمراجعة اللغوية

دار وادي عبقر للطباعة والنشر

رئيس مجلس الإدارة

جابر الزهيري

المدير التنفيذي

لمياء حمدي

جميع حقوق الطبع والنشر

محفوظة للمؤلف ، ولا يحق لأي

دار نشر طبع و نشر و توزيع

الكتاب إلا بموافقة كتابية من

الكاتب و الناشر



دار وادي عبقر

للطباعة و النشر و التوزيع

بيت الإبداع .. و موطن العباقرة



wadiabkr.wixsite.com/wadiabkr



wadiabkar@gmail.com



www.facebook/ wadiabkar



www.youtube.com/ wadiabkr /



٠١١٤١٧٢٨٦٢٥

٠١١٠٠٤٧٤٥٧٥ ت

٠١٢٢٤٩٦٩٠٤٨ ت

٠١٢٢١٤٨١٨٥٦ ت



إهداء

إلى كل الأحرار من هذا الوطن
إلى كل من دافع و استبسل دفاعاً عن الأرض و العرض
إلى كل من قال تحيا مصر

محمد علي حماد



الشخصيات

الدكتور خليل

أحمد أبو قناوى

مرعي حماد

محمد مرعي

الحاج محمود

أبو شهبه

بوب

الثوار

ضابط مكتب بوب

القائد ويلسون

المحامى الانجليزي

الضابط تشارلي

قائد كتية الحصار

جندي بريطاني ١

أهل ديرمواس في مسجد أولاد محمود



مقدمة

بلد العسل والدم
والصدق والهيبة
ورجال عظام الشأن
ما تعرف العيبة
وقفوا في وش الظلم
والمفتري الغاصب
ولا كان في بالهم ثناء
ولا شهرة ومناصب



الفصل الأول



المشهد الأول

طريق زراعي بين الحقول حيث يقف مجموعة من الفلاحين
يبدو عليهم البؤس والشقاء يظهر في المشهد حمار مربوط من
بعيد يخص أحد الفلاحين.

الفلاح الأول: وبعدين في المرار الطافح اللي شايفينه ده ؟
شقيتين وبنزرع وبنتعب ومش طايلين أي حاجة

الفلاح الثاني: بقالي يومين مافيش عندي في البيت عيش حاف
حتي والعيال هيموتوا من الجوع مافيينيش أي
حاجة تتاكل.

الفلاح الأول: ومين سمعك أنا اديلي ثلاث شهور ما شفتش
اللحمة... إلا هي اللحمة شكلها إيه ؟.

الفلاح الثاني: لحمة يا مفترى؟ هو احنا شايفين العيش الحاف.

الفلاح الأول: الحكومة بتوزع علينا عيش حاف حتي الغيطان
مافيش فيها أي حاجة تتاكل.

الفلاح الثاني: والغيطان هيجيها منين... الإنجليز فرضوا علينا
نزرع قطن بس.



الفلاح الأول: كله لمصلحة الانجليز

الفلاح الثاني: الإنجليز بياخدوا كل حاجة، حتي البهايم واحنا مش واخدين غير الغلب.

الفلاح الأول: طب وبعدين هانعمل إيه ونتصرف إزاي؟... لازم يكون فيه حل.

الفلاح الثاني: سعد باشا زغلول نفوه برّه مصر والناس بحري بتغلي وشكلها ها تبقى ثورة.

الفلاح الأول: سيبك من الغلب اللي احنا فيه وشوف لنا حاجة تتاكل.

الفلاح الثاني: مافيش غير ورق القطن، وده مرشوش بالمبيدات يا إما شوية نجيلة.

الفلاح الأول: ما تشوف لنا شوية رجلة أو جعضيض.

الفلاح الثاني: كان فيه شوية رميتهم للحمار وأكلهم من شوية.

الفلاح الأول: (ينظر إلى الحمار بنهم ويتلمظ) أكلت لحم حمير قبل كده يا وله؟

الفلاح الثاني: شامم في كلامك شيء مش ولا بد!!

الفلاح الأول : إيه رأيك لو ندبح الحمار.. واحنا مضطرين وربك غفور رحيم



الفلاح الثاني: (بهلع) كله إلا الحمار.. ترضي حد يدبح أخوك ؟

الفلاح الأول: الجوع يحكم يا صاحبي.

الفلاح الثاني: بزمتهك ترضي تاكل لحم حمير.... شيء مقزز!!

الفلاح الأول: مقزز؟؟(مشيراً إلي الجماهير) دا أقل واحد من الناس دي واكل يبجي نص حمار.

الفلاح الثاني: الحمار ده عشرة عمري والعشرة ما تهونش.

الفلاح الأول: يعني هو الحمار أهم من البني آدم؟

الفلاح الثاني: (بغضب) مستحيل!!

الفلاح الأول: وأنا باقول هاندبح الحمار يعني هاندبجه.

الفلاح الثاني: خلي يومك يعدي يا جدع إنتا.

(يبدأن في الشجار وفجأة يدخل إلي المسرح عسكري إنجليزي يرتدي الزي المميز لعساكر الإنجليز).

العسكري الإنجليزي: إنتي عامل دوشة ليه منك ليها فلاح متخلف؟

الفلاح الثاني : مافيش يا جوني إحنا اخوات مالکش دعوة بينا

العسكري : أنا شفتكوا بتتعارك فلاح منك له... أنا عاوز نعرف
إنتي يتعارك ليه؟

الفلاح الأول: ما هو قال لك إحنا اخوات واطلع منها انتا.

(ينظر العسكري الإنجليزي إلي الحمار).

العسكري : حمار بتاع مين ده ؟

الفلاح الثاني : إنت الحمار ده مالكش دعوة بيه.

العسكري : أنا موس همار(مش حمار) إنتي همارة (حمارة)
فلاح مصري متخلف.

العسكري :الحمار ده يخص جيش إنجليزي.... يخص قوات
بريطانية.

الفلاح الأول : حتي الحمير يا ظلمه

العسكري : أنا قلت الحمار ده يخص جيش إنجليزي.

الفلاح الثاني : أنا باقول نتفاوض أحسن يا شاويش.

العسكري : مافيش تفاوض مصري فلاح.

(يأخذ العسكري الإنجليزي الحمار بينما يظل الفلاحان مكانهما)

ستار

المشهد الثاني

القصر

صالة كبيرة بها عدد من المقاعد يجلس عليها مجموعة من أهل ديرمواس لمقابلة الدكتور خليل أبوزيد عقب عودته من لندن بعد لحظات يدخل الخادم حاملاً صينية الشاي ليضعها علي مائدة أمام الجميع.

الخادم: اتفضلوا الشاي يا جماعة علي ما الدكتور يلبس هدومه وينزل يقابلكم.

الحاج مرعي: علي راحته.

(يضع الخادم الشاي ثم ينصرف)

الحاج مرعي: (هامساً لابن أخيه) ربنا يهديه وما يفكرش في موضوع العمودية.

ابن أخيه : (هامساً) يسمع منك ربنا

أحمد أبوقناوي: (متوجهاً بحديثه للحاج مرعي) منور يا عم الحاج ..عاش مين شافك.

الحاج مرعي: عشت وبقيت يا ولدي... إياك جاي للدكتور
يشوف لك وظيفة في الحكومة؟

أحمد أبو قناوي: لا والله يا عم الحج.. أنا قلت آجي أسلم علي
الدكتور واستمتع بحديثه وحكايته.

الحاج مرعي: والله يا ولدي الدكتور شخصية تستاهل كل خير.

(يتدخل الحاج محمود في الحوار.. الحاج محمود رجل في الخمسين من
عمره تبدو عليه أمارات الصحة والنعمة)

الحاج محمود: ولما هو شخصية تستاهل كل خير عاوز تترشح
ضده ليه ع العمودية؟

الحاج مرعي: (في ضيق) أنا باقول إنه أخذ الدكتوراه من
لوندون (لندن) والعمودية مش هتبقى لايقة
عليه زي المرحوم أبوه... المرحوم أبوه كان
خيال.

(من أحد الأبواب يدخل الدكتور أبو زيد.. رجل وسيم يرتدي
جلباباً صعيدياً).

الدكتور خليل: السلام عليكم ورحمة الله وبركاته يا أهل
دير مواس الكرام.

الجميع: وعليكم السلام ورحمة الله وبركاته.

أحد الحضور: شوف التواضع مع إنه درس في بلاد برّه إلا إنه معترز بالجلابية.

شخص آخر: ألف حمد الله ع السلامة يا ابن الأصول.

(يصفح الدكتور خليل أبوزيد الحضور بحرارة ثم يتوجه إلى أحد الملقاعد فيجلس).

الدكتور خليل: وإيه أخباركم وأخبار عيالكم وزرعكم؟

أحمد أبوقناوي: هما الإنجليز سابوا حاجة للناس... الإنجليز نهبوا كل خيرات البلد... حتي الحمير والجمال بياخذوها لصالح المجهود الحربي.

الحاج محمود: والله يا بيه الناس مش لاقية العيش الحاف... والحكومة بتوزع عيش على الناس من قلة.

أحد الحضور: الإنجليز فرضوا علينا زراعة القطن... وبعد جني القطن بياخذوه.

أحد الحضور: (متوجهاً لمديته للدكتور خليل) وإيه أخبار الناس في بر بحري يا بيه؟

الدكتور خليل: الأوضاع بحري لا تسر عدو ولا حبيب... الإنجليز حطوا أيدهم علي كل حاجة... وألغوا الدستور وأعلنوا الأحكام العرفية... ووصل بيهم

الافترا إنهم ينفوا سعد باشا زغلول لمالطا
والشعب كله غضبان والبلد بتغلي.

أحمد أبو قناوي: واحنا فين من اللي بيحصل ده؟ لازم يكون لنا
صوت... لازم يكون لنا موقف... لازم نعبر عن
موقفنا.

الحاج مرعي: (متهمكماً) وهانعبر عن غضبنا إزاي يا ولد أبو
قناوي؟ هانعمل مظاهرة قدام دوار المرحوم
أبوك؟ والا هانعمل احتجاج عند بيتكم؟

(ينظر إليه أحمد في ضيق واضح)

الدكتور خليل: الأستاذ أحمد كلامه منطقي وسليم لازم يكون لنا
موقف.

(يتداخل أبو شهبه في الحوار .. وهو رجل في الخامسة والخمسين من
العمر يعمل في مصلحة السكة الحديد)

أبو شهبه: أنا سمعت إن بوب هيرجع من قبلي في القطر
الأسبوع الجاي... يا سلام لو القطر يقف ونعرض
عليه مطالبنا.

الدكتور خليل: (كمن يفكر بينه وبين نفسه) لو القطر يقف....
لو القطر يقف....

أحمد أبو قناوي: أنا باقول نخط لافتات نكتب عليها طلباتنا على محطة السكة الحديد.

الدكتور خليل: اممممم.. ماحدش هيلحق يقرأ.. وخصوصاً لو القطر كان سريع.

الحاج مرعي: يا جماعة خلونا في حالنا.. إحنا مش قد الإنجليز دول ممكن يهدوا البلد على دماغ اللى فيها.

الحاج محمود: (متجاهلاً كلام الحاج مرعي) يا جماعة دي مرور بوب في الوقت ده بالذات فرصة عظيمة لازم نحسن استغلالها.

الدكتور خليل: طب والحل يا جماعة نعمل إيه ؟؟؟؟

أحمد أبو قناوي: أنا عندي اقتراح يمكن يعجبكم.

(تتوجه أنظار جميع الحاضرين صوب أحمد أبو قناوي)

أحمد أبو قناوي: (مواصلاً) أنا باقول نخط كمر حديد قدام القطر

علشان نوقفه... ونعمل وقفة سلمية عند محطة

القطر يوم ١٨ مارس الجاي... لازم بوب يسمع

احتجاجنا ورفضنا للوجود الإنجليزي في مصر.

(يكمل موجهاً حديثه نحو الدكتور خليل)

أحمد أبو قناوي: وحضرتك تقول كلمة باللغة الإنجليزية وأنا اقرأ

ترجمتها بعد ما حضرتك تخلص.

الدكتور خليل:(بانبهار) يسلم فمك يا ولد أبو قناوي...

(ثم يتوجه بحديثه للحاج محمود) : بص يا أحمد
أنا عارف إنك إنسان وطني غيور علي وطنك
لذلك عاوزك تجمع لي كل أهل ديرمواس
المخلصين علشان نعمل وقفة سلمية علي محطة
السكة يوم ١٨ مارس الجاي وخلي بالكم انا
باقول وقفة سلمية.

الجميع: توكلنا علي الله

ستار

الفصل الثاني



المشهد الأول

مكتب بوب

مكتب فخم أنيق عليه علم إنجلترا يجلس خلفه بوب رجل
إنجليزي الملامح أحمر الوجه اشقر الشعر يراجع بعض التقارير
بعد لحظات يسمع صوت طرق علي الباب.

بــــــــــــوب: ادخل.

(يدخل ضابط إنجليزي برتبة ملازم يؤدي التحية العسكرية بأدب
واحترام أمام بوب)

بــــــــــــوب: إيه أخبار مساجين مصريين؟

الضابط : للأسف الشديد مش راضيين يعترفوا يا افندم.

بــــــــــــوب:(بضيق ضارباً سطح المكتب بقبضته) عذبوهم
علشان يعترفوا

الضابط : عذبناهم وضاعفنا العذاب وبرضوا مافيش فائدة.

بــــــــــــوب:(غاضباً) طيب امنعوا عنهم الأكل والشرب.

الضابط : منعنا عنهم الأكل والشرب... وحرمانهم من النوم... وبرضو مافيش فائدة.

بــــــــوب:(مفكراً) عذبتوهم ومنعتوا عنهم الأكل والشرب وحرمتوهم من النوم ومش فيه فائدة... بصي زابط هات لي قادة الثوار هنا حالاً.

(ينصرف الضابط بينما يقف بوب ويغادر مكتبه متأملاً خريطة علي الحائط مسكاً بإحدى يديه الأخرى خلف ظهره.. بعد لحظات يعود الضابط الإنجليزي ومن خلفه مجموعة من السجناء الثوار... يؤدي الضابط التحية العسكرية).

بــــــــوب:(دون أن يلتفت) انصرف إنتي زابط.

(يؤدي الضابط التحية العسكرية من جديد ثم ينصرف فيبقى بوب لحظات يتأمل الخريطة ثم يستدير لينظر إلى الثوار).

بــــــــوب:(بدهشة مصطنعة) مين عمل فيكم كذا؟ إنتو ثوار أحرار بتدافعوا عن بلدكم.. إنتو تستحقوا كل احترام وتقدير.

أحد الثوار:(متهكماً) ماحدش عمل فينا أي حاجة... إحنا لقينا نفسنا فاضيين قلنا لازم نتسلى شوية.

بــــوب: تعجبني روح فكاهة عند المصريين... بس أنا لازم يعاقب اللي عمل فيكم كدا.

ثائر ثاني:(ساخرًا) كتر خيرك يا سعادة البيه.. مالوش لزوم

ثائر ثالث:(بحماس) كله يهون علشان مصر... تحيا مصر.

جميع الثوار:(يهتفون) تحيا مصر ويسقط الاحتلال الإنجليزي.

(ينظر إليهم بوب في غضب ويضرب سطح مكتبه في حدة)

بــــوب:(غاضبًا) اخرس مصري حقير... عاشت انكلترا مهيمنة ومسيطرة علي العالم.

(يعود بوب لبيسيطر علي غضبه وعلي أعصابه بسرعة ثم ينظر إلى الثوار محاولاً السيطرة علي الموقف)

بــــوب: أنا عارف إن انتوا زعلانين علشان انكلترا احتلت مصر... بس غلط إن انت تضيع نفسك علشان ناس تانيين... مافيش حد غيركم عمل مظاهرات ناس كتير عايشة في حالها بتشوف مصالحها وإنتم في سجن!!.

أحد الثوار:(متوجهًا بكلامه لرفاقه) اوعى حد يسمع كلامه دا عاوز يفرق بيننا ويوقعنا.

بــــوب:أنا عاوز مصلحتك... إنتي موش اندك ايال؟
(عندك عيال) مش نفسك تربى امالك؟

ثائر ثانى: كلنا فداكي يا مصر..... تحيا مصر.

جميع الثوار:(يهتفون خلفه) تحيا مصر.

(ينادى بوب على أحد الضباط فيدخل ويؤدي التحية العسكرية)

بــــوب:(مخاطبا الضابط) إنتى إزاي تحرمى ثوار أحرار من
الطعام... روجي حالاً هاتي أكل للناس المحترمة دي

الضابط:-(مؤدياً التحية العسكرية) تمام يا افندم.

(يخرج الضابط)

بــــوب:(متوجهاً بجديته للثوار) واضح إن إنتى موش
أكلتي من مدة طويلة... أنا راح يجيب لك أكل
وشرب وكل اللي إنتي عاوزاه.

أحد الثوار:(بريبة) والكرم ده كله جاك من إمتى يا حضرة
الجنرال؟

ثائر ثانى: والسؤال الأهم... الكرم ده مقابل إيه؟؟؟؟؟

(لحظات ويدخل الضابط حاملاً صينية عليها أرغفة من الخبز والكثير من البيض المسلوق وبعض ثمرات من الطماطم وأشياء أخرى... يضع الضابط الصينية على مكتب بوب... ثم يؤدي التحية العسكرية وينصرف).

بــــــــوب:(متوجهاً بحديثه للثوار) يللا مصري كل... يللا تعالوا علشان تاكلوا.

ثائر ثالث: متشكرين يا حضرة الجنرال ناكل كده يوم طهورك

بــــــــوب:(في دهشة) طهوري؟؟ يعني إيه يوم طهوري؟؟

أحد الثوار: (هازئاً) يوم طهورك دا اليوم اللي بيقطعوا لك فيه الـ....

(يتلعثم ثم ينظر إلى بقية الثوار فيبتسمون رغم صعوبة الموقف)

بــــــــوب:(cut what)؟ كت وات... يقطعوا إيه مصري لئيم ؟؟؟؟

أحد الثوار: ما تاخدش في بالك حضرة الجنرال.

بــــــــوب:(متجاوزاً الحديث) أنا عارف إن إنتى موش
أكلتي من زمان... (ميسك ببيضة)البيض دى
بتاعك إنتى.

أحد الثوار:(للاّخر مازحاً) بيضك ده ؟؟

ثائر ثانى: لا والمصحف... أنا بيضى معايا... واللى يقرب
منه أشيله من ع الأرض شيل.

كبير الثوار:بص يا حضرة الجنرال... كل حيلك مكشوفة...
إحنا مستحيل نخون بلدنا أو نسلّم أهالينا مقابل
لقمة أو حيلة رخيصة من حيلك.

(ينظر بوب إلى أحد الثوار يبدو عليه آثار التعذيب ويتظاهر بالأسى
لحاله)

بــــــــوب: مين عمل كدا في مصري ثوري حر...

(ينادي بوب بصوت مرتفع على الضابط فيدخل مؤدياً التحية)

الضابط : ياس سير

بــــــــوب: خد مساجين علي زنازينهم وسيب ده بس(مشيراً
إلى أحد المساجين)

الضابط: (متوترًا) دي الكائد بتاع ثوار... دي خطر يا افندم

بــــــــوب: (بثقة) نفذ الأمر زابط وموش تكلك (تقلق).

(ينفذ الأمر وينصرف فيبقى بوب والسجين... ثم يعود بوب إلى مكتبه)

بــــــــوب: أنا يعرف إن إنتي من عائلة عريقة عندك زوجة وأولاد وعندك وظيفة محترمة... إنتي كنتي يشتغل شغل جميل برّه سجن... إنتي ليه يحرم أولادك منك... أولادك محتاجينك.

السجين: (بثبات) مصر أهم عندي من روعي.

بــــــــوب: أنا عاوز يخدم إنتي... أنا يعرف إن إنتي ثائر وطني بيحب بلده... أنا عاوز منك طلب بسيط... عاوزك تقول أسماء ثوار أحرار علشان نقدر نحميمهم... كمان عاوز إنتي يبطل مظاهرات ضد انكليز.

السجين: (بحماس) نموت نموت وتحميا مصر.

(يستشيط بوب غضبًا ويصيح بصوت غاضب)

بــــــــوب: (بغضب) جووون.

(يدخل جون)

جــــــــون: ياس سير.

بــــــــوب:(متوعداً ومهدداً) خذ مصري كلب دى... عذبه
وامنع عنه أكل وشرب هو وكل متأمرين ضد
بريطانيا العظمى.

(يقتاد جون السجين إلى الخارج)

الســــــــجين:(بحماس) تحيا مصر... تحيا مصر.

(بعد لحظات يعود جون مؤدياً التحية)

جــــــــون: فيه معلومات خطيرة وصلتنا من جواسيس.

بــــــــوب:(في اهتمام) معلومة إيه؟

جــــــــون: فيه مجموعة من ثوار هيعملوا مظاهرة احتجاج
علي رصيف محطة... هيقفوا قطار بالقوة...
علشان يعبروا عن احتجاجات سلمية.

بــــــــوب: انجليز مش يخاف... اضرب نار في المليون...
فاهم جون إنجليزي مش يخاف... اضرب نار في
مليون.

جون: المجد لبريطانيا العظمى الإمبراطورية التي لا
تغيب عنها الشمس

ستار

المشهد الثاني

محطة القطار

محطة سكة حديد حيث يوجد يافطة مكتوب عليها محطة قطار ديرمواس... على القضبان يوجد مجموعة من الكمرات والكتل الحديدية موجودة علي القضبان لعرقلة حركة القطار على أرصفة القطار يوجد الدكتور خليل أبوزيد ومجموعة من الثوار في انتظار وصول القطار.

الدكتور خليل: يا جماعة إحنا مش عاوزين أي عنف... مش عاوزين دم... عاوزين نورّي العالم إننا مسالمين وأصحاب حق.

أحمد أبوقناوي: (هامسا) علي فكرة فيه ناس كتير معاها سلاح.

الدكتور خليل: (في غضب) إزاي ده يحصل وماحدث بيلغني... إزاي ناس تشيل سلاح في تظاهر سلميّ؟؟

ثائر ثاني: (شارحا) طب افرض إنهم بدأوا بالشّر وضربوا علينا نار هيكون إيه موقفناهنموت فطيس؟

ثائر ثاني: العين بالعين والسن بالسن والبادي أظلم.

الدكتور خليل: (يبدو عليه السخط والأسى) يا جماعة عاوزين نتفق علي حاجة... مش عاوزين نبدأ بالشر... إحنا جايين علشان نعبر عن رفضنا للوجود الإنجليزي في مصر.

الدكتور خليل: (بينه وبين نفسه) ربنا يستر.

(تسمع صوت صافرة قطار قادم من بعيد ثم صوت القطار قبل توقفه)

ثائر ثاني: (مشيرا) القطر وقف وفيه مجموعة من العساكر بيتقدمهم رتبة.

الدكتور خليل: دا الجنرال بوب رئيس مصلحة السجون الإنجليزية.

أحمد أبو قناوي: جهز الخطبة اللي هاتقولها بالإنجليزي يا دكتور.

الدكتور خليل: خطبة إيه دلوقتي... ربنا يستر.

(يدخل الجنرال بوب في عنجهية وأنفة وكبرياء)

بــــوب: إنتي ليه يمنع قطار إنجليزي من الهركة مصري
متخلف... إنتي موش يعرف إن دي جريمة ولازم
تتأكبي أليها (تتعاقب عليها).

الدكتور خليل : we want you to hear us

أحمد أبوقناوي: إحنا عاوزينك تسمعنا.

بــــوب:(في عنجهية) جنرال إنجليزي يسمع فلاح مصري؟
دي مهزلة؟

الدكتور خليل: إنتو أغراب ولازم ترحلوا من بلادنا.

بــــوب:(في غرور) الإنجليز أسياذ مصريين... إنتو مجرد
عبيد في الإمبراطورية التي لا تغيب عنها الشمس.

الدكتور خليل: المصري حر وهيفضل طول عمره حر مش عبد
لأي جنس أو ملّة.

بــــوب:(بغضب) أنا كولت (قلت) مصري عبد يزرع قطن
علشان بريطانيا العظمى... يزرع كصب... إنتو
شويّة عبيد.

(تتعالى همهمات استنكار غاضبة من الملتظاهرين).

بــــوب:(آمرا) يللا مصري فلاح منك له حوش حديد
وكاذورات من طريق قطار.

الدكتور خليل : إنتو لازم ترحلوا عن بلادنا...

بــــوب:(في غضب) وأنا كولت إنتي لازم يرفع كاذورات
من طريق عسكر إنكليزي... وإلا كلكوا راح
تموتوا... إنتي يفهم ولا موش يفهم؟

المتظاهرون: نموت نموت وتحيا مصر... تحيا مصر... تحيا
مصر.

الدكتور خليل: انت لازم تسمعنا.

بــــوب:(في غضب وعناد) أنا موش راح يسمع... إنتي
راح يسمع رعد في ودانه... إنتي راح يسمع
صوت موت حالاً.

(يشير بوب إلى جنوده بالعودة إلى القطار فيخرجون وهم معهم

من باب المسرح وبعد ثوان يسمع بوب أمراً جنوده)

بــــوب:(للجنود) اضرب نار في مليون... أنا عاوز كل
المصريين يموتوا.

(يسمع صوت طلقات البنادق فيتفرّق المتظاهرون وهم يهتفون)
المتظاهرون: نموت نموت وتحيا مصر تحيا مصر... تحيا مصر
(يتفرّق المتظاهرون فلا يسمع سوي صوت طلقات الرصاص وصرخات
هنا وهناك وبعد لحظات يسود الهدوء علي المسرح فيدخل بعض
الثوار ومعهم الدكتور خليل أبو زيد)

أحد الثوار: بوب وكل اللي معاه ماتوا.

الدكتور خليل: البادي أظلم هم اللي ابتدوا بضرب النار... ولو
سكتنا كانوا أبادونا... إحنا كنا في حالة دفاع
شرعي عن النفس.

أحمد أبو قناوي: الإنجليز مش هيسكتوا... إحنا لازم نعمل حسابنا.

(تدخل مجموعة أخرى من الثوار)

أحد الثوار: إحنا ثابتين على مبدأنا لحد آخر نفس.

أحمد أبو قناوي: (متوجها بجديته للدكتور خليل) الخطوة الجاية
هتكون إيه؟

الدكتور خليل: الإنجليز مش هيقدرنا يعملوا حاجة إلا لو حصلت
خيانة مننا فينا.

أحمد أبو قناوي: تقصد إيه يا دكتور؟

الدكتور خليل: إحنأ نجمع أهل ديرمواس كلهم... مسيحيين
ومسلمين ويحضر معانا شيخ وقسيس... المسلم
يخلف ع المصحف والمسيحي يخلف ع الإنجيل.

أحمد أبوقناوي: ها تجمع أهل ديرمواس عندك في جنينة القصر؟

الدكتور خليل: لأ في الجامع... جامع أولاد محمود... علشان
اللي يخون يبقى خان ربنا والوطن.

المتظاهرون: (بحماس) نموت نموت وتحيا مصر... تحيا مصر
تحيا مصر... تحيا مصر

ستار

الفصل الثالث

المشهد الأول

المسجد

مسجد كبير عند المحراب (القبلة) يوجد مائدة مستطيلة
على جانبها يوجد مصحف يقف خلفه شيخ وعلى الجانب الآخر
إنجيل خلفه يقف قسيس يرتدي الصليب، وفي صحن المسجد
يجلس أهل دير مواس.

أحد الجالسين: (في هلع) الإنجليز مش هيسكتوا... أكيد هيهذوا
دير مواس على دماغنا.

رجل آخر: ما تبقاش جبان... ما ياخدش الروح إلا خالقها.

الحاج مرعي: (بتشفي) عملوا نفسهم رجالة ساعة زمن
وهيعيشوا حريم بقية عمرهم بس ربنا يستر
وما ياخدوناش في رجليهم.

الحاج محمود: تقصد إيه يا حاج مرعي ؟ المصريين طول
عمرهم رجالة واللي عملوا كده هيخلده التاريخ
وهيفضلوا في وجدان الناس.

الحاج مرعي: بلا وجدان بلا ترتان... هتشوف الإنجليز هيعملوا
إيه فيهم وفينا.. هيدكوا البلد فوق راسهم وراسنا.

الحاج محمود: أنا شامم في كلامك ريحة حاجة مش كويسة
ولولا إنا ف الجامع كنت سمعتك كلام ما يسرّش.

شخص بجواره: تفتكر الموضوع ده هايعدي علي خير؟

الحاج محمود : أنا مش خايف... إنا أصحاب حق واللي يعمله
ربنا هيكون.

الجار: إنت ما سمعتش الإنجليز عملوا إيه في دنشواي
سنة ١٩٠٦؟

الحاج محمود: عملوا اللي عملوه إنا مش خايفين ومش جبنا.

(يدخل الدكتور خليل أبوزيد فيسود الصمت وتتطلع إليه جميع
العيون؛ فيقف خلف المائدة بين القسيس والشيخ)

الدكتور خليل : يا أهل ديرمواس الأشاوس... يا أهل ديرمواس
الأمجد... يا أهل ديرمواس الأحرار... إنتو
ضربتوا أروع الأمثلة في حب مصر... وعملتوا
عمل بطولي عظيم هيخلده التاريخ... بس اللي
عملتوه ده هيغيظ المستعمر ويخلي ناره تقيد...
ومش هيقدر يعمل حاجة ولا يخترق صفنا إلا
بالخيانة ومن خلال أصحاب النفوس الضعيفة
(يخفض الحج مرعي رأسه بطريقة لا ارادية) لذلك إنا
هنا كلنا مسيحيين ومسلمين في بيت ربنا... علشان
نحلف كلنا علي كتاب الله إن ما حد فينا يخون...

كلنا ها نحلف علي كتاب الله إن ما حد فينا يدي
الإنجليز معلومات عن الثوار وأنا هابدأ بنفسي
(يضع يده علي المصحف) أقسم بالله العظيم وبكتابه
الكريم إني ما أخون بلدي وما أدّي أي معلومات
للإنجليز....

(يقف أحد الحضور هاتفاً)

أحد الجالسين: نموت نموت وتحيا مصر... تحيا مصر... تحيا
مصر....عاش الهلال مع الصليب.

(يهتف الجميع خلفه بحماس ثم يتوالي خروج الجميع للقسم أمام
القسيس وأمام الشيخ)

ستار

المشهد الثاني

مدخل ديرمواس الرئيسي حيث ينتشر به المارة، بينما يقف الدكتور خليل أبوزيد ومعه أحمد أبو قناوي وكيرلس في هيئة فلاحين.

كيرلس: يا جماعة إحنا واقفين هنا ليه؟ المفروض إن إحنا نستخبى... نشوف مكان نتدارى فيه.

أحمد أبوقناوي: وبعدين يا دكتور المكان ده بالذات ما ينفعش نقف فيه... ده المدخل الرئيسي اللي هيدخل منه الإنجليز... إحنا كدا بنسلم أنفسنا بإيدينا!!.

(فجأه يدخل علي خشبة المسرح ابو شهبة لاهثا متوجها بمديثة للدكتور خليل)

أبو شهبة: الحق يا بيه... فيه قوات إنجليزية كثيرة هاتنزل ديرمواس... الإنجليز ناويين ع الانتقام والشر.

أحمد أبوقناوي: أنا باقول نهرب نشوف مكان نتدارى فيه بدل ما نسلم أنفسنا بإيدينا.

كيرلس: أنا نفسي أفهم الدكتور خليل بيفكر في إيه؟ و واقف هادي وثابت إزاي وإحنا في الموقف العصيب ده؟

الدكتور خليل : (بثبات) قل لن يصيبنا إلا ما كتب الله لنا... ثانيًا
الإنجليز ما يعرفوش حد من الثوار وكمان ماحدش
بيتكلم إنجليزي غيري ولو ماعرفوش يتفاهموا مع
حد ممكن يعذبوا ناس كتير... لذلك أنا قررت إني
أخدعهم.

أحمد أبوقناوي : دي فكرة جميلة... بس فيها مخاطرة!!.

كيرلس : انت كدا بتضحى بنفسك!!.

الدكتور خليل : (في ثقة) ما تخافوش أنا عندي ثقة في الله... بس
لازم انتو تتفرقوا وتفقوا بعيد لأن وجودكم هيثير
الشكوك.

أحمد أبوقناوي : إحنا مش ممكن نسيبك.

كيرلس : اللي بتعمله دا انتحار.

الدكتور خليل : يا جماعة انتو كدا هتبوظوا كل حاجة... أرجوكم
سيبوني واستخبّوا بعيد.

(يهزان رأسيهما في استسلام وينصرفان بعيداً بينما يظل الدكتور
خليل وحيداً، بعد لحظات تدخل قوة من الجيش الإنجليزي مدججة
بالسلاح... ينظر قائدهم حوله باحثاً عن شخص يتحدث اللغة
الإنجليزية)

القائد الإنجليزي: any body here speaks English
؟(أي حد هنا يتكلم إنجليزي؟)

الدكتور خليل : yes sircan I help you ؟
أي خدمة

القائد الانجليزي:(يخرج ورقة من جيبه ويقدمها للدكتور خليل)
إنتي تعرفي حد من الأسماء في ورقة دي؟

(يتناول الدكتور خليل الورقة وينظر فيها بتأني ودقة محاولاً
التعرّف علي كل الأسماء المطلوبة)

الدكتور خليل : (يبدأ في قراءة الاسماء) خليل أبوزيد... أهد
كيناي... كيرلس هنا... جرجس دانيال...

القائد الانجليزي: إخلص إنتي يعرف حد اسمه مكتوب في ورقة؟
(يتابع الدكتور خليل القراءة لمعرفة أسماء المطلوبين)

الدكتور خليل :دول كلهم فلاحين يشتغلوا في غيطان مش
موجودين دلوقتي دول كلهم يرجع بيته في
ليلat nightdo you understand
فلاحين يشتغلوا في غيطان إنتي يفهم... عاوز
تعكشهم ابقى تعالى بالليل.

القائد الإنجليزي: ...thank you Good citizen

شكراً لك أيها المواطن الصالح... (متوجهاً

بجديته لمن معه من الجنود) إحنا يمشي

دلوقتي... وييجي بالليل يمسك ثوار متمردين.

(يغادر القائد الإنجليزي المسرح بينما يظهر كيرلس وأبو قناوي

ويتوجهان نحو الدكتور خليل ، بينما يظهر الحاج مرعي وهو يسير

خلف الإنجليزي)

أحمد أبو قناوي: الله عليك يا دكتور.

كيرلس: إنت كده عرفت أسماء المطلوبين وهتبلغهم

علشان يهربوا.

الدكتور خليل: أنا خايف من حاجة.

أحمد أبو قناوي: خايف من إيه يا دكتور؟

الدكتور خليل: خايف من الخيانة... لو حصلت الإنجليزي هيدمروا

ديرمواس كلها

كيرلس: أنا باقول ننتبه ونحذر أهل ديرمواس.

الدكتور خليل : توكلنا علي الله.

ستار

المشهد الثالث

الخيانة

معسكر للإنجليز يظهر فيه القائد الإنجليزي ويلسون يقف متابعاً الحركة بالمعسكر، بعد لحظات يدخل النقيب الإنجليزي تشارلي يدخل وخلفه مجموعة من الجنود يؤدي التحية العسكرية للقائد ويلسون فيردّها باهتمام.

القائد ويلسون: فين متمردين بتوع ديرمواس؟

تشارلي: مش في بيوت دول فلاحين يشتغل في غيطان يرجع بيته بالليل.

القائد ويلسون: إنتي ليه مش ياخذ قوات ويروح يجيب فلاحين من غيطان؟

تشارلي: دي شيء خطير حضرة كاند... ممكن يكون فيه كمين... ممكن يكون فيه مسلحين.

القائد ويلسون: إنتي لازم يقبض على متمردين وسلمهم للمحاكمة فوراً

تشارلي: حضرة قائد عظيم ويلسون مش فيه عندنا أي معلومات عن متمردين ولا نعرف ملامح حد منهم لازم يكون فيه جواسيس ترشدنا.

القائد ويلسون: (يهز راسه مؤمناً) كلام معقول تشارلي... اعمل مكافأة لأي حد يرشد عن متمردين ثوار... أي حد يرشد عن متمردين له مكافأة كبيرة.

(يدخل أحد الجنود فيؤدي التحية العسكرية للقائد ويلسون ثم يهمس في أذنه بكلمات فتلمع عيناه في سعادة ويبتهج وجهه وتنملل أسارير)

القائد ويلسون: جميل... جميل عسكري... روعي هاتي مصري خاين فوراً عسكري.

(يخرج الجندي الانجليزي ثم يعود مصطحباً الحاج مرعي)

القائد ويلسون: إنتي عندك معلومات؟

الحاج مرعي: أيوه يا حضرة القائد...

القائد ويلسون: خلي بالك مصري... لو معلومات مفيدة... إنتي راح ياخذ مكافأة كبير ويبقي لك مكانة عظيمة.

الحاج مرعي: ما هو أنا جاي علشان كدا.

القائد ويلسون: يلا قوللي معلومات بسرعة.

الحاج مرعي: نتفق الأول يا قائد.

القائد ويلسون: نتفق على إيه مصري...؟ إنتي عاوز مكافأة فلوس...؟ إحنا يديكي فلوس.

الحاج مرعي: أنا مبسوط وعندي طين وفلوس والحمد لله... أنا شعبان من بيتي.

القائد ويلسون: (بنفاذ صبر) إنتي جاي يضيع وقت قائد إنجليزي؟ قول إنتي عاوز إيه؟

الحاج مرعي: أنا عاوز امسك العمودية.

القائد ويلسون: (بدهشة) إنتي عاوز يمسك... إيه؟

الحاج مرعي: (موضحًا) العمودية.

القائد ويلسون: (ينادي على أحد الجنود) عسكري.

الجندي: (مؤدّيًا التحية) ياس سير.

القائد ويلسون: إنتي يفهم عربي كويس... شوف مصري دي عاوز إيه.

الجندي: إنتي عاوزه إيه مصري؟

الحاج مرعي: أنا عاوز امسك العمودية.

الجندي: من حيث المسك إنتي راح يمسك كتيير.

الحاج مرعي: (بريبة واشمئزاز) هامسك إيه؟ وضّح كلامك...

طريقة كلامك مش مريحاني... بلاش امسك دي... أنا عاوز أبقى عمدة.

الجندي: (موجهًا حديثه للقائد) هو يريد أن يصبح عمدة (mayor) لديرمواس.

(يهز القائد ويلسون رأسه دليلاً على الفهم)

القائد ويلسون: إنتي عاوز يمسك العمودية... أنا هيخليكي تمسك كتير.

الحاج مرعي: (مرتاعًا) يا نهارأزرق... دا هيقول لي مسك

تاني... شكلهم فهموني غلط... (مخاطبًا نفسه)

يكونش أنا شكلي شمال... (متوجهاً بحديث للقائد)

أنا عاوز أكون عمدة ديرمواس.

القائد ويلسون: إنتي راح يبقي mayor عمدة بتاع ديرمواس

بس أنا عاوز إنتي يحكي كل شيء... يقول كل

حاجة عن ثوار ديرمواس... عن متمردين قتلوا

جنرال بوب.

الحاج مرعي: (في سعادة من ظفر بما يريد) طالما ها بقى العمدة
يبقى strong Strong قوي قوي.

(يبدأ في سرد ما لديه من معلومات عن الثوار)

ستار

المشهد الرابع

شوارع ديرمواس

في أحد شوارع ديرمواس يقف مجموعة من المتظاهرين والأهالي ويقف معهم الدكتور خليل أبو زيد وغيره من الثوار.

الدكتور خليل: (مخاطبا الجميع) يا جماعة أنا مستعد أسلم نفسي للإنجليز علشان أحافظ عليكم وعلى ممتلكاتكم و....

أحمد أبو فتاوي: (مقاطعا) : إيه اللي بتقوله ده يا دكتور...؟؟ كلنا فدا مصر.

كيرلس: إنت عملت واجبك تجاه وطنك... وإحنا كلنا وراك (هتفت سيدة من الحضور)

السيدة: كلنا فدا مصر

الدكتور خليل : يا جماعة أنا مقدر حماسكم... بس الإنجليز جابرة ما عندهم ش رحمة... ممكن يدمروا الدنيا... زي ما عملوا في دنشواي وغيرها كتير

أحد الثوار: يعملوا اللي يعملوه... المصري عمره ما كان
جبان ولا بيفرط في وطنه.

السيدة:(تهتف) نموت نموت وتحيا مصر... تحيا
مصر... تحيا مصر.

الجميع : (يهتفون) نموت نموت وتحيا مصر.

الدكتور خليل : توكلنا علي الله ...

(بعد لحظات تدخل قوة إنجليزية ترتدي الملابس العسكرية البريطانية
يتقدمهم القائد ويلسون وخلفه تشارلي ومجموعة من الجنود)

القائد ويلسون:فين دكتور خليل أبوزيد ومجموعة ثوار متمردين
مخربين... لازم كله يسلم نفسه حالاً.

(تتقدم سيدة)

السيدة: كلنا خليل أبوزيد... كلنا فدا مصر.

القائد ويلسون:أنا قلت لازم متمردين يسلم نفسه وإلا هنقتل كله
بلا رحمة.

أحمدأبوقناوي:عاش الهلال مع الصليب.

القائد ويلسون:(بنفاز صبر) أنا قلت لازم متمردين يسلموا أنفسهم

كيرلس: نموت نموت وتحيا مصر... تحيا مصر.

(يشير ويلسون إلى الجنود فيأخذون وضع الاستعداد ويصوبون
البنادق نحو الملتظاهرين ويسمع صوت أجزاء البنادق فيتحفز الثوار
ويأمر القائد الجنود بإطلاق النار، فتسود حالة من الهرج والمرج
ويسمع صوت البنادق هنا وهناك، وتري النساء يقذفن الجنود
ببلاليس العسل، ثم نري المرأة و هي تستدرج الجنود لأعلى المنازل
وتلقي بنفسها مع الجنود من أعلى سطوح المنازل فتختلط دماء
الجنود ودمائهن بالعسل... كل هذه الأحداث يتخللها هتافات
الثوار... يلاحظ وجود شهداء من الشعب المصري إلى جانب وجود
قتلي من الإنجليز و تختلط دماء الجميع بالعسل الموجود علي
الأرض...)

ستار



المشهد الخامس

المحاكمة

مائدة طويلة مستطيلة يجلس خلفها مجموعة من الرتب الإنجليزية استعداداً لمحاكمة الدكتور خليل أبو زيد والنوار، بعد لحظات يدخل الدكتور خليل والنوار مكبلين في الأغلال... يقف النوار في شموخ أمام المحكمة العسكرية الإنجليزية التي يترأسها القائد ويلسون ومن خلفهم منصة الإعدام وأنشوبات الإعدام معدة لتنفيذ الحكم .

القائد ويلسون: (مشيراً إلى الدكتور خليل) إنتي اسمك إيه؟؟
وسنك كام؟

الدكتور خليل : أنا اسمي خليل وصفتي مصري وعمرى سبعة آلاف سنة... لا أقبل ذل أو مهانة... وأرضى هي مقبرة الغزاة.

القائد ويلسون: إنتي يتكلم بالألغاز ليه مصري جبالان؟

الدكتور خليل : المصري عمره ما كان جبال.

القائد ويلسون: إنتي عندك محامي يدافع عنك مصري متمرد؟

الدكتور خليل : أنا مش متهم علشان أجيب محامي...إنت المحتل
الغاصب... إنت المتهم مش أنا.

(يتجاهل ويلسون كلام الدكتور خليل وينظر إلى الحضور ليرى من
سيدافع عن الثوار المتمردين، فيقف شخص يبدو من ملامحه أنه
إنجليزي)

المحامي: أنا مستعد يدافع عن ثوار.

القائد ويلسون:(في دهشة) إنتى إنجليزي... إزاي يدافع عن
مصري مجرم قتل جنرال بوب رئيس مصلحة
سجون إنجليزي ؟؟؟؟؟؟؟؟؟

المحامي: قبل ما أكون إنجليزي أنا إنسان... و دي واحد
شخص حر نزيه يدافع عن وطنه وأرضه.

القائد ويلسون:(متوجهاً بحديثه للدكتور خليل) إنتى اشتركتي
مع ثوار وقتلتي جنرال بوب رئيس مصلحة
سجون إنجليزي... الكلام دي صحيح ؟

الدكتور خليل:إحنا كنا في حالة دفاع شرعي عن النفس... إحنا
حبينا نقوله ارحل عن ديارنا إنت وكل المحتلين...
هو رفض وأطلق علينا النار.

القائد ويلسون: من حق هو يطلق نار يقتل مصري... بس مش
من حق مصري يرد... إنتي بس يموت... إنتي
فلاح عند بريطانيا عظمى.

المحامي: who Said this؟ من قال هذا المصري
إنسان مسالم شريف علي مر العصور... عمره
ما كان جبان... الله أعطاه الحرية... المصري
مثقف... مبدع... وطني... مصري عمره ما كان
عبد عند حد... أنا يقول حق... مصري دي موش
غلطان... مصري دي بيدافع عن أرضه وعن
وطنه... مفروض ندي مصري دي مكافات...
مش محاكمات....

(ينظر القائد ويلسون والدكتور خليل للمحامي في دهشة)

المحامي: (مواصلا بنفس الحماس) إنجلترا لازم يرحل
ويسيب مصر للمصريين.

الثوار: (في حماس) عاشت مصر حرة مستقلة... عاش
الهلال مع الصليب... يسقط الاحتلال الإنجليزي.

القائد ويلسون: إذن إنتي معترفه إنك قتلتني جنرال بوب؟

الدكتور خليل: إحنا كنا في حالة دفاع شرعي عن الأرض كنا في
حالة دفاع شرعي عن العرض... في حالة دفاع
شرعي النفس... إحنا مش قتلة انتو القتلة.

القائد ويلسون: إنتي عارف عقوبة دي إيه؟ إنتي راح يموت...
إنتي لازم يتشنق...

المحامي: (مقاطعا) سيدي القاضي الناس دي كانت في
حالة دفاع عن أوطانهم وبيوتهم... ومافيش
قانون في العالم بيحاكم إنسان بيدافع عن
أرضه... لازم تطلق سراح ثوار.

القائد ويلسون: (متجاهلا المحامي ومتوجهاً لمجديته للدكتور خليل)
محكمة ممكن يخفف أحكام لوإنتي توعدني بعدم
تعرض لقوات إنجليزية... لوإنتي يبلغ عن بقية
ثوار... لوإنتي يعتذر ممكن محكمة تخفف
أحكام... وإنتي وثار ممكن يعيش.

(يسود الصمت لحظات في قاعة المحكمة فتتوجه الأنظار إلى الدكتور
خليل ومن معه من الثوار)

القائد ويلسون: (مواصلا حديثه) هه قلتي إيه؟

الدكتور خليل: (ينظر إليه بسخرية) عارف لو عندي ألف نفس
وهتعدمها نفس نفس... عمري ما اخاف ولا
اتراجع عن حب مصر.

الـثوار: نموت نموت وتحيا مصر... تحيا مصر.

القائد ويلسون: (للدكتور خليل) دي آخر كلام عندك؟

الدكتور خليل : مهما تعمل إنت وأمثالك من الطغاة... المصري عمره ما هايخاف أو يستسلم.

القائد ويلسون: (متوجهاً بحديثه للمحامي) عندك أي دفاعات أخرى حضرة محامي؟

المحامي: لأ... مش عندي حضرة قاضي.

(يبيل القاضي علي عضو اليمين لحظات ثم على عضو اليسار لحظات للمداولة)

القاضي: حكمت المحكمة حضورياً على خليل أبوزيد ومن معه من الثوار بالإعدام شنقاً.

الدكتور خليل : كلنا فداكي يا مصر.

الثوار : كلنا فداكي يا مصر.

(يشير القائد ويلسون للحراس للبدء في تنفيذ حكم الإعدام فيتقدمهم الدكتور خليل إلى منصة الإعدام في شموخ مرفوع الرأس)

الدكتور خليل : كلنا فداكي يا مصر... كلنا فداكي يا مصر... لو ألف نفس تهون عشاتك يا وطن... لو ألف نفس وألف روح تهون عشاتك يا وطن.

(يقف القائد ويلسون ومن معه في إجلال واحترام ويؤدون التحية العسكرية بينما يتوجه الدكتور خليل في ثبات نحو المنصة ...)

ستار

تمت بعون الله

محمد علي حماد

السيرة الذاتية

محمد علي محمد حماد

ليسانس آداب لغة انجليزية ١٩٩٩

فاز بالمركز الخامس مستوي الجمهورية مجال القصة القصيرة
بمسابقة القوات المسلحة الأدبية ٢٠١٦

فاز بالمركز الرابع مجال شعر عامية مستوي الجمهورية ٢٠١٧

فاز بالمركز الأول عن محافظة المنيا مجال القصة القصيرة عام
٢٠٠١ و ٢٠٠٢ على التوالي

فاز بالمركز الخامس مستوي الجمهورية مجال القصة القصيرة
بمسابقة الشباب و الرياضة ٢٠٠٠

تحت الطبع رواية بنت أكابر (الدجاوي)

مجموعة قصصية (أمل)

ديوان شعر (إلى تلميذة)



